



IBRAH HAJI

Elly Johana Johan & Zalilah Abd Aziz

Labbaikalla humma labbaik,
Labbaik la syarika laka labbaik.
(Ya Allah, aku datang menyahut panggilanMu.
Tiada sekutu bagiMu)

Innal hamda wanni'mata laka wal mulk,
laa syarika laka.
(Segala ni'mat dan puji
kepunyaanMu dan kekuasaanMu.
Tiada sekutu bagiMu)

Sujud syukur padaMu Ya Allah
Atas undangan yang sungguh istimewa
Menyelusuri jejak kekasihMu dikota penuh berkah
Menyempurnakan rukun Islam yang lima
Semoga ibadahku menjadi bekalan darul akhirah

Aku datang sebagai pendosa
Musafir sebagai hamba yang hina
Kau sambut dengan penuh ihsan dan mesra
Semoga pengampunanMu aku terima
Aku mohon sebaik-baik tempat kembali ke sana

Aku, kau dan dia tiada beza
Semua tetamuNya dilayan sama sempurna
Saat dilimpahi rahmat penuh mencurah
Ketika dicuit dengan ujian yang melemah
Segala pergantungan hanya padaMu Ya Allah
Nikmat tenteram, aman dan damai mengelilingi Baitullah

Hijrah Rasulullah dari Mekah ke Madinah
Pengorbanan Sarah menerima Hajar kerana Allah
Kepayahan Hajar antara Safa dan Marwah
Ketaatan Ibrahim melepaskan Ismail dengan penuh qanaah
Semua dan segala kepayahan yang dilalui dengan redha
Kau akhirnya dengan penuh manis berhikmah
Benarlah segala kalam yang kau firmankan Ya Allah
'Kerana sesungguhnya, selepas kesusahan akan datang kesenangan' (94: 5-6)